

## DOMENIE VII «VIE PAL AN»

### Jutoris pe Liturgjie

Ai 24 di Fevrâr dal 2019

*Ancje in cheste domenie o gjoldìn di une grande uniche pagine dal vanzeli di Luche.*

*Luche nus incjante e nus imbroie cu la sô prose che o podìn clamâle poesie, nus fâs diventâ poetis ancje nô, al dismôf la imaginazion e nus propon utopiis che a scjaldin il cûr; vuê tun amôr al prossim che nol è di chest mont e che nus fâs diventâ fîs dal Altissim.*

*O podìn dî che dute la vite di Jesù e segne il so sedi fedêl al comant di amôr ricevût dal Pari: tignî dongje malâts, vuarps, çuets, pidimentâts, publicans e pecjadôrs ((Zn 5, 3; cf. Lc 5, 27-32) tun profont afiet, concret, cence misure.*

*Di cheste esperience e cjape consistence ogni peraule dal Signôr.*

*Crist, prime di proponi la no-violence e l'amôr universâl, ju à vivûts su la sô piel ancje cun grancj berlis, lagrimis (Eb 5, 7) e nemîs di ogni sorte; i siei insegnaments sul amôr fîn ai vuestris nemîs ju à imparâts te puce de int e i son costâts il sanc.*

*Par chest, vuê a messe no scoltìn ni leteradure, ni poesie, ni ideologjie, ma sapience “antigone come lis montagnis” (Gandhi).*

*O cirarai di meti in pratiche i conseis dal Signôr. A saran la mê dignitât, la nestre civiltât e salvece.*

#### Antifone di jentrade

Sal 12,6

**I**ntal to boncûr, Signôr, o ai vude fede;  
che si indalegri il gno cûr te tô salvece.  
I cjantarai al Signôr che mi à judât.

#### Colete

Diu onipotent, danus la gracie  
di meditâ simpri ce ch'al è just,  
par podê fâ, cu lis peraulis e cu lis voris, lis robis che ti plasin.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

#### PRIME LETURE

1 Sam 26,2.7-9.12-13.22-23

**Il Signôr ti veve metût tes mêns mans e jo no ai volût slungjâ la mê man.**

*Ce tant bieles che e reste la vite dal re David (Prin e secont libri di Samuel): cussi umane, e dute vivude in ben e mâl, in pecjât e gracie fin dapît.*

*Splendid il fat di cheste prime leture e cetant atuâl pe nestre societât li che no cres perdon e riconciliazion ma a cjapin simpri plui pît violencis di ogni sorte in cualsisedi situazion, categorie e etât.*

*E si ritignìn civiltât intant che il trafic des armis al è in continui aument e ben plaçât ancje in Italie. O vivìn simpri plui di nemîs nevrotics; o vin propit dibisugne di esemplis come chest di David cun Saul.*

#### Dal prin libri di Samuel

In chei dîs, Saul si metè in marce, al le jù tal desert di Zif cun trê mil oms, i plui bulos di Israel, parfâ saltâ fûr David dal desert di Zif.

E cussì David e Abisai a lerin jù, di gnot, fin li ch'a jerin intropâts chei altris: a cjatarin Saul distirât e indurmidît tal campament, cu la sô lance impirade in tiere dacjâf di lui, e Abner e i soldâts a jerin distirâts ator di lui. Alore Abisai i disè a David: «Vuê Diu ti à metût il to nemî tes tôs mans. Poben, lassimal a mi, che lu inclaudî in tiere cu la sô lance, cuntun colp, cence dibisugne di molâdint un altri». Ma David i disè a Abisai: «No sta copâlu! Cui rivaressial a metii lis mans intor al onzût dal Signôr e a fâle francje?».

David al cjolè la lance dacjâf di Saul e la bufule da l'aghe e si 'nt lerin: nissun nol viodè e nissun nol savè, nissun no si sveà, che ducj a durmivin come çocs parcè che ur jere plombade intor une pendolarie mandade dal Signôr. David al passà di chê altre bande e si fermà su la spice de mont, lontan. A jerin une vore distants un dal altri.

David al berlà: «Ve la lance dal re. Un dai zovins ch'al vegni sù a cjolile. Il Signôr i darà a ognidun seont justizie e fedeltât: vuê il Signôr ti veve metût tes mêns mans e jo no ai volût slungjâ la mê man cuintri dal consacrât dal Signôr».

Peraule di Diu.

### SALM RESPONSORIÂL

dal Salm 102

*Salm di ricognossince al Signôr pe sô misericordie viers ognun di nô: Perdonadis... vuarît... tirade fûr... incoronât... bon e di boncûr... pegri tal inrabiâsi... grant tal perdonâ... Cjalant a lis nestrîs miserîs e a la sô bontât, nus tocje dî:*

#### **R. Il Signôr al è bon e grant intal amôr.**

*Se cjantât: Il cjant dai salms responsoriâi p. 232.*

Benedis, anime mê, il Signôr,  
dut ce ch'al è in me il so non sant al benedissi.  
Benedis, anime mê, il Signôr,  
e no sta lassâ in dismentie nissun dai siei plasês. **R.**

Lui ti à perdonadis dutis lis tôs colpis,  
ti à vuarît di ducj i tiei mâi;  
al à tirade fûr de buse la tô vite,  
ti à incoronât di boncûr e di gracie. **R.**

Bon e di boncûr al è il Signôr,  
pegri tal inrabiâsi e grant tal perdonâ lis colpis.  
No nus à tratâts daûr dai nestrîs pecjâts;  
no nus à paiâts daûr des nestrîs colpis. **R.**

Come ch'al è lontan dal amont il jevâ dal soreli,  
cussì al à slontanât di nô lis nestrîs colpis.  
Come che un pari al à dûl dai siei fîs,  
cussì il Signôr al à dûl di chei che lu rispjetin. **R.**

### SECONDE LETURE

1 Cor 15,45-49

*Come ch'o vin quartât il stamp dal om di pulvin, cussì o quartarin il stamp dal om dal cîl.*

*Culî Pauli al da des spiegazions che a dipendin dai siei studis fats a Jerusalem e fûr de nestre mentalitât. Tal so insegnament chest al è clâr: la muart e romp il cicli dividint il prin e il dopo. O resurissarin ma il nestri cuarp al vignarà mudât de potence dal Spirt a imagine di Crist resurît.*

#### **De prime letare di san Pauli apuestul ai Corints**

Fradis, il prin om, Adam, al è diventât une creature vive, ma l'ultin Adam al è diventât spirt ch'al da vite. Però nol è stât prime il cuarp spirtuâl, ma il naturâl, e dopo il spirtuâl. Il prin om, tirât fûr de

tiere, al è di pulvin, ma il secont om al ven dal cîl. Come ch'al è l'om di pulvin, cussì a son chei di pulvin; come ch'al è chel dal cîl, cussì a saran ancje chei dal cîl. E come ch'o vin puartât il stamp dal om di pulvin, cussì o puartarin il stamp dal om dal cîl.

Peraule di Diu.

### CJANT AL VANZELI

Zn 13,34

#### **R. Aleluia, aleluia.**

Us doi un comandament gnûf, al dîs il Signôr:  
che si voledis ben un cul altri,  
come che ancje jo us ai volût ben a vualtris.

#### **R. Aleluia.**

### VANZELI

Lc 6,27-38

*Vêt remission come ch'al à remission Diu, vuestri Pari.*

*I comentadôrs par sistemâ chest vanzeli ancje lu tafagnin e cualchidun lu slargje fin a la cuistion sacrosante de jutizie. A smamissin cussi la peraule di Diu dal moment che a insegnin dutrinis che a son precets di oms... E di robis come chestis vualtris in' fasês un stragjo (Mc 7, 7. 13).*

*Par meti in pratiche chest vanzeli, no coventin studis di sorte e nancje resonâ masse cul nestri cjavut. Bisugne lâ diretamentri li dal Signôr e scoltâlu midiant de preiere. Lui che al è bon ancje cui triscj nus palesarà a nô triscj come che o sin (cf. Lc 11, 13), il troi dal pardon e dal amôr fintremai ai vuestris nemîs.*

#### **Dal vanzeli seont Luche**

In chê volte, Gjesù al disè ai siei disepui: «A vualtris che mi scoltais us dîs: Volêt ben ai vuestris nemîs, fasêt ben a di chei che us odein. Benedît chei che us maludissin; preait par chei che us fasin mâl. Se cualchidun ti da un pataf di une bande de muse, presentii ancje chê altre; se cualchidun ti gjave la manteline, lasse che ti cjoli ancje la tonie. Daur a ducj chei che ti domandin; e se cualchidun ti robe ce ch'al è to, no sta tornâjal a domandâ indaûr. E come ch'o volês che us fasin chei altris, cussì fasêt ancje vualtris cun lôr. Se ur volês ben dome a di chei che us vuelin ben, ce merit varêso? Ancje i pecjadôrs a fasin compagn. E se ur fasês ben dome a di chei che us fasin ben, ce merit varêso? Ancje i pecjadôrs a fasin compagn. E se ur imprestais dome a di chei ch'o sperais di cjapâ, ce merit varêso? Ancje i pecjadôrs a imprestin ai pecjadôrs par vê indaûr compagn. Volêt ben invezit ai vuestris nemîs, fasêt ben e imprestait cence sperâ nuie sore, e la vuestre ricompense e sarà grande e o sarês fîs dal Altissim. Di fat lui al è bon ancje cun chei che no an agrât e cui triscj.

Vêt remission come ch'al à remission Diu, vuestri Pari. No stait a giudicâ e no sarês giudicâts. No stait a condanâ e no sarês condanâts. Perdonait e us vignarà perdonât. Dait e us vignarà dât: int cjaparês in misure buine, cjalcjade, scjassade e incolme di spandi, parcè che cun chê stesse misure ch'o misurais, us vignarà misurât ancje a vualtris».

Peraule dal Signôr.

#### **Su lis ufiertis**

Celebrant i tiei misteris cul rivuart ch'a mertin,  
ti prein, Signôr,  
ch'al zovi pe nestre salvece  
ce ch'o ufrin in onôr de tô maiestât.  
Par Crist nestri Signôr.

#### **Antifone a la comunion**

Sal 9,2-3

O vuei contâ dutis lis robonis che tu âs fatis.  
O vuei jessi content e plen di ligrie,  
o vuei cjantâ il to non, Altissim.

## Daspò de comunion

Diu onipotent, danus par plasê di rivâ a chê salvece  
che midiant di chescj misteris  
o vin vude la capare.  
Par Crist nestri Signôr.

\* \* \*

## Riflession di pre Antoni Beline: **Dâ par vê**

A àn vût scrit e dit che une volte il mont al leve indevant a sun di caritât, ma che e mancjave la justizie. E no si leve ben, parcè che il siôr al podeve vê e nancje no vê cussience. E po i dirits a son dirits e no àn di dipendi de lune di chel che al è parsore.

Podopo e je rivade la justizie a ogni nivel, amancul come principi. Il dirit al à fate sparî un pôc la caritât...

*Vanseli par un popul, an C, p. 121*

\* \* \*

## Cjants

*Libri **Hosanna**, sot il titul **Eucaristie**: messe, benedizion eucaristiche, rîts e cjants; dal n.7 al n.62 comprendût.*

\* \* \*

***La nestre int di pâis di une volte e à cirût di praticâ il vanzeli di amôr racomandât dal Signôr:***

- + ***nissun pitoc al leve vie di une puarte di cjase cence un cop di farine o di mignestre;***
- + ***ogni forest cjatave di gnot un sotet te stale o tal fen;***
- + ***i fruts no vevin di savê dai contrascj che a jerin fra fameis;***
- + ***te malatie o te muart bisugnave presentasi su la puarte ancje se a jerin rusins fra vizins;***
- + ***i derelits a vevin di partî di chest mont visfîts come princips...***
- + .....

\* \* \*

\* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

\* *Il cjant dai salms resposoriâi, Ed. Glesie Furlane, 2012.*

\* *50 corâi de cristianitât todescje voltâts par furlan, ed. Glesie Furlane, 2016.*

\* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*

\* *Par domandâ chescj libris scrivêt a [info@glesiefurlane.org](mailto:info@glesiefurlane.org)*